



## JUDICIAL SYSTEM MONITORING PROGRAMME

## PROGRAMA DE MONITORIZAÇÃO DO SISTEMA JUDICIAL

### *Komunikadu Imprensa*

19 Feveiru 2014

### **Komunidade Suco Loi Lubo antusiasmu simu treinamentu dalan ba justisa formal husi JSMP**

Iha 19 Feveiru 2014, *Judicial System Monitoring Programme* (JSMP) liu husi Unidade LRU no Unidade Relasaun Públiku, realiza treinamentu iha Suco Loi Lubo, Sub Distritu Vemase Distritu Baucau. Partisipante treinamentu kompostu husi Xefe Suco, Xefe Aldeia, Grupu Feto, no komunidade husi aldeia. Total partisipante sira hamutuk nain 30 ne'ebé konsiste ho mane nain 10 no feto 20.

Antes ne'e iha aprosimasaun inisial atu realiza treinamentu ne'e, lider komunitariu sira hamutuk ho estrutura konsellu suco tomak hatudu sira nia antusiasmu hodi simu treinamentu ne'e.

Hanesan mos iha treinamentu sira antes iha distritu seluk, materia treinamentu ne'e kontinua subliña kona-bá direitu ema nian, kna'ar juis, prokurador, advogadu privadu no defensor públiku, klasifikasaun kazu krime sira no oinsa komunidade sira prosesa kazu krime sira tuir sistema justisa formal.

*“Treinamentu ne'e hanesan pasu importante ida atu informa ba komunidade antrave hosi lideransa komunitáriu sira nune'e bele hasa'e sira nia koñesimentu iha sistema justisa formal atu ajuda sira nia komunidade wainhira akontese krime ruma iha sira nia suco laran,”* dehan Diretór Ezekutivu JSMP, Luis de Oliveira Sampaio.

Iha parte seluk, Sr. Laurentinho da Costa, Xefe Suco Loi Lubo iha ninia abertura no enseramentu ba treinamentu ne'e haktuir katak, *“nia lori komunidade iha suco refere agredese no agradese teb-tebes prezensa JSMP atu fahe informasaun importante kona-bá lei, no direitu umanu no materia legal relavantes sira iha setór justisa formal. Liutan nia hatutan, nu'udar lideransa komunitáriu sira sente treinamentu fo benefisiu tebes ba sira, hanesan mata-dalan ba sira wainhira infrenta kazu ka krime ruma.*

Partisipantes sira ne'ebé marka prezensa iha treinamentu hatudu sira nia antusiasmu no interese makas atu kumpriende materia hirak ne'e. Ida ne'e bele nota husi durante hala'ó treinamentu partisipante sira ativu teb-tebes husu perguntas wainhira sira la-dun kumpriende didiak informasaun hirak ne'ebé maka hatu'o husi treinador.

Aliende ne'e partisipante sira mós espera katak treinamentu hanesan ne'e la to'o deit iha ne'e maibé bele kontinua nafatin iha futuru tanba iha nivel aldeia sira ka área rural sira difisil tebes hodi asesu ba informasaun kona-bá sistema justisa formal.

Iha fatin hanesan, Sra. Maria nu'udar sekretaria suco rekomenda ba JSMP, atu bele fahe tan informasaun ne'ebé iha ligasaun ho lei no justisa ba sira atu nune'e sira bele komprinde diak liu tan.

Atividade treinamentu ne'e realiza tanbá hetan suporta fundu husi Embaixada **Canada iha Jakarta –Indonesia.**

Tuir planu iha loron 27 Feveireiru 2014, treinamentu ikus ba projetu ne'e sei realiza fali iha Distritu Viqueque.

Atu hetan tan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl